



Caru Gwenyn
Bee Friendly



Llywodraeth Cymru
Welsh Government

CWESTIYNAU CYFFREDIN

BETH YW CARU GWENYN?

Cynllun Tasglu'r Cynllun Gweithredu ar gyfer Pryfed Peillio yw Caru Gwenyn, i annog sefydliadau a chymunedau ar hyd ac ar led Cymru i helpu pryfed peillio.

Yr amcan yw gwneud Cymru y wlad Caru Pryfed Peillio gyntaf yn y byd!

SUT MAE'N GWEITHIO?

Bydd Pencampwyr Caru Gwenyn yn cael eu penodi ym mhob rhanbarth. Bydd y pencampwr yn cynghori ac yn helpu cymunedau a sefydliadau sydd am Garu Gwenyn i'w helpu i gynllunio'r hyn y maen nhw am ei wneud a'u hannog i gyflwyno cais i fod yn gymuned neu sefydliad Caru Gwenyn.

Bydd y Pencampwr Caru Gwenyn yn asesu'r ceisiadau sy'n dod o'i ranbarth ac yn rhoi ei ymateb i'r ymgeisydd. Bydd sefydliadau a chymunedau llwyddiannus yn cael tystysgrif ac yn cael defnyddio logo Caru Gwenyn ar eu deunydd cyhoeddusrwydd.

AI CYNLLUN AR GYFER GWENYN YN UNIG YW CARU GWENYN?

Nage. Mae'n bwysig helpu pob math o bryfed peillio, nid gwenyn yn unig. Mae hynny'n cynnwys glöynnod byw, gwyfynod a chlêr hofran yn ogystal â gwenyn gwyllt a gwenyn cyffredin.

BETH YW BLAENORIAETHAU CARU GWENYN?

Mae gan Caru Gwenyn **BEDAIR** blaenoriaeth:

Bwyd

Gwneud yn siŵr bod bwyd (fel blodau gwyllt brodorol) ar gyfer pryfed peillio yn eich ardal.

Cartre pum seren

Darparu lleoedd i bryfed peillio fyw ynddyn nhw.

Dim plaladdwyr na chwynladdwyr

Addewid i beidio â defnyddio cemegau sy'n gwneud drwg i bryfed peillio.

Hwyl

Cael y gymuned i gymryd rhan ac esbonio wrth bobl pam eich bod yn helpu pryfed peillio.

A OES ARIAN YN GYSYLLTIEDIG Â CARU GWENYN?

Nid oes gan Lywodraeth Cymru arian i helpu cymunedau a mudiadau sy am fod yn Garwyr Gwenyn, ond fel rhan o'r cyngor a'r help, awgrymir ffynonellau ariannol eraill allai'ch helpu.

PWY SY'N CAEL YMGEISIO?

Mae'r cynllun yn agored i fudiadau, sefydliadau a chyrrff o bob rhan o Gymru. Gallech fod yn Gyngor Tref neu Gymuned, mudiad cymunedol, ysgol, coleg neu brifysgol, awdurdod lleol, corff cyhoeddus arall yng Nghymru, busnes, menter gymdeithasol, addoldy, grŵp celf, clwb chwaraeon – caiff pob sefydliad all wneud gwahaniaeth gymryd rhan.

PWY SY'N PENDERFYNU BETH SY'N CAEL EI WNEUD?

Grwpiau lleol sy'n gwybod beth sydd ei angen yn eu hardal a'r ffordd orau o'i wneud. Rydyn ni wedi cyhoeddi Canllaw Gweithredu sy'n rhestru gweithgareddau o dan bob un o flaenoriaethau Caru Gwenyn. Ond y gymuned neu'r mudiad sydd â'r gair olaf ar ôl ystyried cyngor a help y Pencampwyr Caru Gwenyn. I fod yn rhan o'r cynllun Caru Gwenyn, rhaid ichi ymrwymo i gynnal o leiaf un weithgaredd o dan bob un o flaenoriaethau Caru Gwenyn.

A OES ANGEN PARATOI ADRODDIAD?

Oes. Rydyn ni am i sefydliadau a chymunedau roi adroddiad inni am y gwaith maen nhw'n ei wneud o dan bob un o'r 4 blaenoriaeth. Gallwch ddefnyddio Arolwg OPAL Polli:nation¹ fel dull safonol o fonitro pryfed peillio, cyn ac ar ôl cynnal eich gweithgaredd.

AI DIM OND AM FLWYDDYN MAE'N PARA?

Nage. Mae'n bwysig mai dim ond dechrau'r gwaith fyddwch chi yn y flwyddyn gyntaf i helpu pryfed peillio! Rydyn ni'n gobeithio y gwnaiff cymunedau a mudiadau ymrwymo i adeiladu ar waith blwyddyn 1, gan ddenu mwy o bobl o'u cymuned a graddol gynyddu'r gweithgareddau sy'n cael eu cynnal er lles pryfed peillio. Bydd y gymuned neu'r mudiad yn tyfu'n fwy ac yn fwy o Garwr Pryfed Peillio wrth i amser fynd yn ei flaen.

Wrth lenwi ffurflen gais Caru Gwenyn, bydd angen i ymgeiswyr nodi'r hyn y maen nhw'n gobeithio'i wneud yn y blynyddoedd i ddod.

Rhaid i bob cynllun Caru Gwenyn gyflwyno cais adnewyddu flwyddyn ar ôl ennill statws Caru Gwenyn. Gofalwch fod gennych gofnod eich bod yn gweithio at wireddu'r amcanion a chadwch fanylion unrhyw ddigwyddiadau rydych yn eu cynnal, hanes eich gwaith lleol, ffotograffau, sylw gan y cyfryngau ac unrhyw wybodaeth berthnasol arall.

Bydd un o'n Pencampwyr Caru Gwenyn yn gallu'ch helpu i lenwi'ch cais adnewyddu.

A GA I DDEFNYDDIO'R CYFRYNGAU CYMDEITHASOL?

Cewch. Byddwn yn annog pawb i ddweud am eu gwaith ar y cyfryngau cymdeithasol.

BLE CA I FWY O WYBODAETH?

Mae'r holl wybodaeth sydd ei hangen arnoch am Caru Gwenyn ar wefan Partneriaeth Bioamrywiaeth Cymru:

www.biodiversitywales.org.uk/Cynllun-Gweithredu-Cymru-ar-gyfer-Pryfed-Peillio